

Huet

I.

Dame, merci: se j'aim trop hautement,
Ne me vueilliez por ma folor grever.
Merci vos pri issi fetierement,
Qu'il ne vos poist se je vos vueil amer;
Qu'au sovenir me puis tant déliter
En vo gent cors, ou il n'a qu'amender,
Car Dieus le fist sor toz autres plus gent.

II.

Ahi! Amors, con savez sagement
Ceus que volez a vostre part torner;
Qu'avant fetes a lor oès un présent,
Qu'il ne puissent a lor cuer trestorner.
Ainsi me fet Amors embriconner,
Que por ma mort me fet adès penser,
La ou valors et raisons me defent.

III.

Raisons me dit et raisons me consent,
Douce dame, que je vos doie amer;
Mais vo beautez qui m'atire et esprent
Est la raisons qui bien me puet grever;
Car n'est pas droiz que doiez avaler
Vostre haut pris, por moi tant alever,
Se par pitié resons ne le consent.

IV.

Se vrais amis puet nul recovrent
En gentil cuer par loiauté trover
Donc ne doit pas Amors son jugement
Desloiaument encontre moi fauser,
Qu'ele doit bien par tout droit délivrer
Ceus qu'ele voit por li embriconner,
Quant mis i sont par son esfoxcent.

V.

Certes, dame, se j'aim trop folement,
Nus ne m'en doit les coupes demander;
Qu'Amors fet si de moi a son talent
Que ne me puis de riens amesurer;
Car le délit de joie desirrer
Me done adès; et si me fet penser

Tant que je sui hors de mon essiënt.

- letto 383 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/huet-14>